

1 Timoteo ingante Pabodo cadota ante tänöta nänö yewæmongainta

Timoteo ingante Pabodo yewæmongampa

¹ Botö Pabodobo inömo imopa. Itota Codito nänö në da godongaïmo imopa. Itota Codito waa pönï nänö inö bai mönö adobai bacæmöimpa, ante pönëmompä. Inique Itota Codito mönö në pönëngä tönö Wængongui mönö imonte në Ængaingä tönö botö imote äna ëñëñömote da godöna godïmo imopa. ² Timoteo ëñëmi, Bitö acæbiimpa, ante bitö imite yewæmömopa. Edæ mönö wede pönëno ante apænebo në ëñëniimi inte bitö Itota Codito quïmi badinque näwä botö wëmi bai inömi imipa. Inique botö, Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämopa.

Wadäni wapiticæ näni odömonte apænedö

³ Botö Mäatedöniabæ inömo pöninque bitö imite, Epeto inömo ee ongöe, nanguï antabopa. Mäninömo wadäni babæ wapiticæ näni odömonte apænedö ante në odömonte apænedönäni inänite bitö, Minitö godömenque mäninö ante odömonte apænedämaï iedäni, ante ämi ëñencædänimpa. Mänömainö ante do botö äninö bai ñowo adodö ante bitö imite ämopa. ⁴ Ayæ, Dodäni önonque ante näni tedegainö ante pönënämaï quëwëedäni, ante bitö ancæbiimpa. Ayæ adobai tömënäni wæmæidi tæiyænäni ante pönëninque, Æmönänidö ingainänii, ante ancaa änewëñönäni bitö tömënäni inänite, Minitö mäninö ante pönënämaï iedäni, ancæbiimpa. Edæ

mānīnō nāni tedewēnō beyæ tōmēnāni, Æbānō ī, ante nanguī wæætedō wæætē ānewēnānīpa tōō. Wæætē edæ, Wængonguī nānō cædō ante wede pōnēnīnque mōnō cæquēnēnō guiquēnē tōmēnāni nāni tedewēnō beyæ pōnōmenque cætīmpa.

⁵ Mānōmaīnō ante ānīnque botō, Tōmēnāni mīmō īīmaī entawēnīnque waadete pōnencædānīmpa, ante āmopa. Edæ mīmō waēmō pōnī entawēnīnque tōmēnāni Wængonguī ingante wede nāni pōnēnō beyæ waadete pōnencædānīmpa. Ayæ adobaī nāmā apænte adīnque wentamō mongānāmaī entawēnāni inte tōmēnāni waadete pōnencædānīmpa. ⁶ Īñæmpa pancadāniya mānīnō ante ēñēnīnque Baa ante ñīmpo cæte wadæ godīnque ōnonque ante quēwēnānīpa. ⁷ Mōītee wodi nānō wææ yewæmongaīnō ante odōmonte apæneīnēmōnīpa, ante nē ānāni incæ tōmēnāni nāni odōmonte apæneyedē quīnō apænedānīi, ante ēñēnāmaī īnānīpa tōō. Adobaī quīēmē ante apænedīnque tōmēnāni, īīmaī impa, īīmaī impa, ante apænedāni incæte ēñēnāmaī īnāni inte apænedānīpa.

⁸ Mōītee wodi nānō wææ yewæmongaīnō ante adīnque nōīngā cæmō īnīnque mānīnō tōmēngā nānō wææ angaīnō īñōmō waa ante īmaīmpa, ante do ēñēmōmpa. ⁹ Mōītee wodi nānō wææ yewæmongaīnō ante Wængonguī wīī nē nō cædāni beyæ pōnō wææ angacāīmpa. Wæætē nē ēñēnāmaī cædāni tōnō wadāni mānīnō ante ēñēnāni incæ nē godōmenque wēnæ wēnæ cædāni tōnō tōmēnāni beyæ pōnō wææ angacāīmpa, ante do ēñēmōmpa. Ayæ adobaī Wængonguī ingante Baa ante nē quēwēnāni tōnō wēnæ wēnæ cædāni beyæ wææ angatīmpa. Nē tæiyæ waēmō entawēnāmaī īnōnāni beyæ ayæ adobaī Wængonguī ingante nē badete todōnāni beyæ wææ angatīmpa. Mæmpocā ingante wāānā īnante nē wænōnāni beyæ ayæ adobaī waocā ingante nē pūīnte

wænönäni beyæ wææ angatimpa. ¹⁰ Nänöogængä inämaï iñongante nē towänäni beyæ ayæ adobaï onguïñänäni nänä onguïñæncaya guëa towänäni beyæ wææ angatimpa. Nē cæte quëwengä bacæcäimpa, ante waocä ingante nē godonte äenäni beyæ ayæ adobaï nē babæ änäni beyæ wææ angatimpa. Wadäni inänite, Nö ämönipa ëñeedäni, ante nē babæ änewänäni beyæ ayæ adobaï nö odömonte apænedö incæ nē wadö ante cædäni beyæ wææ angatimpa. Mäninäni tömänäni ëñencædänimpa, ante Wængonguï mäninö ante pönö wææ angacäimpa, ante ëñëmompa.

¹¹ Edæ Wængonguï nãö apäite ëmongampa, ante odömonte apænecæbiimpa, ante tömengä nē waa inongä inte edæ tömengä watapæ nänö apænedö ante pönongä æntabopa. Ayæ nö nänö odömonte apænedö ante Wængonguï nänö pönö angainö ante adodö änö impa.

Wængonguï waadete nänö pönö cædö ante

¹² Itota Codito mönö Awënë pönö cæcä beyænque botö tæï ewocabo batabopa. Tömengä iñömö botö imote waa adinque, Bitö nē pönëmi inte cöwë ædæmö cæbi imipa. Ininque bitö botö beyæ wadäni inänite nē cæbi bacæbiimpa, ante pönö cægacäimpa. Mänömaï beyæ botö tömengä ingante waa ate pönente apænebopa. ¹³ Botö wëenëñedë Itota Codito ingante nē godö babæ ante änewengaïmo imopa. Tömengä ingante nē pönänäni inänite wënæ wënæ cæquïmo, ante nē togænömo inte botö nē piïnte quëwengaïmo imopa. Incæte botö nē pönänämaï inömo inte, Quïnö cæquï, ante ëñänämaï inte cæbo adinque Wængonguï, Quëwencæbiimpa, ante pönö waadete waa cægacäimpa. ¹⁴ Mönö Awënë botö imo nanguï waadete pönö cæcä adinque botö Itota Codito nempo quëwëninque nē wede pönëmo badinque nē waadete pönëmo bagaboimpa.

¹⁵ Īīmaī ante nō pōnī nāni ānō nāwangā ante impa, ante āmo ēñēmaīmīnīpa. Itota Codito ĩñōmō, Wēnā wēnā cāmīni ĩmīnite āmo beyēnque quēwenguīmīni, ante inguipoga wææ pongacāimpa. Tōmengā mǎnōmaī cæcā incæte wadāni wēnā wēnā cædāni ĩñōnāni botō tōmēmoque godōmenque wēnā wēnā nē cægāimo ĩmopa. ¹⁶ Mǎnōmaī beyēnque tōmēmoque godōmenque wēnā wēnā cægāimo ĩñōmote Itota Codito pōnō waadete angā beyēnque quēwengaboimpa. Wēēnēdē botō bai nē wēnā wēnā cægāināni ĩnānite adinque Itota Codito, Botō weca cōwē wantæpiyæ nāni quēwenguinque pancadāniya botō ĩmote pōnenguīnāni ĩnānīpa, ante do ēñengacāimpa. ĩnīnque tōmengā, Botō nē waadete cædinque ee abo ĩmopa, ante tōmēnāni ĩnānite odōmoncæte ante cædinque tōmengā botō Pabodobo ĩmote mǎnōmaī pōnō waadete waa cægacāimpa.

¹⁷ Mōnō Wængonguī ĩñōmō cōwē wænāmaī nē quēwengāingā ĩnongā inte tōmengā ĩncayæ ate adobāi cōwē wænāmaī inte Awēnē Odeye ĩnongā ingampa. Tōmengā awēmō ĩñōmō quēwēnongā ĩñongante mōnō waocabo tōmengā ingante ædō cæte aquīi. Tōmengā wæætē tōmāā nē ēñengāingā ĩnongā ingampa. ĩnīnque tōmengā adocanque Wængonguī ĩnongā ĩñongante mōnō tōmengā ingante cōwē waa aquīmō anguēnē. Tōmengā ingante, Bitō ñāō bai ēmōmi ĩnōmi ĩmīpa, ante apænedinque mōnō ñīne cædāmaī inte cōwē watapæ angæimpa. Cōwē ĩīmaī babaiimpa, ante Amēē, āmopa.

¹⁸ Tīmoteo, botō wēmi ēñēmi. Nē pōnēnāni wēēnēdē Wængonguī beyæ apænedinque bitō ĩmitedō ante nāni angāinō bai adobāinō ante apænedinque botō ĩīmaī āmopa. Edæ tōmēnāni nāni angāinō ante ēñente cædinque bitō tontadoidi nāni cæbai adobāi bitō cæquēnēnō ante guīñēnāmaī inte wæætē tæi ēwocate nanguī cæcæbiimpa. ¹⁹ Wængonguī ingante cōwē

wede pönente incæbiimpa. Adobaï mīmō entawēmi inte nāmā apænte pönēninque wentamō mongænāmaï inte bitō cōwē quēwencæbiimpa. Edæ mini pönencabo iñōminite pancadāniya nāmā apænte änāmaï ināni inte Codito ingante nāni pönēninō ante dobæ ñimpo cæte wadæ godānimpa. ²⁰ Ìimēneo tönō Adecantodo adobaï Wængonguï ingante ñimpo cædinque wadæ godatapa. Ìinque, Tömēna, Wængonguï ingante mönō wēnæ wēnæ ante babæ änāmaï ingæimpa, ante ēñencædaimpa, ante cædinque tōmēna inate Tatāna nempo pædæ godontabopa.

2

Wængonguï ingante mönō iïmaï apænecæimpa

¹ Mīni pönencabo iñōminite botō tāno iïmaï ämopa. Wængonguï ingante mīni apæneyedē quiēmē mīni äëinēnō ante apænecæminimpa. Tömengä ingante waa ate pönente apænedinque waodāni tōmānāni beyæ ante apænecæminimpa ämopa. ² Awēnē odayeidi incæ pönōmenque awēnēidi tōmānāni incæ mönō imonte waa aayōnāni mönō piyænē cæte quēwengæimpa, ante cædinque mīnitō tōmēnāni beyæ ante Wængonguï ingante apænecæminimpa. Edæ Wængonguï ingante mönō cæquēnēnō ante ayæ waodāni inānite mönō cæquēnēnō ante mönō waa cæte quēwencæmōimpa, ante Wængonguï ingante awēnēidi beyæ ante apænecæminimpa. ³ Mänōmainō ante mönō apænedō iñōmō waa impa. Wængonguï mönō imonte nē Ængäingä inongä inte mäninō mönō apænedō ante waa acampa. ⁴ Waodāni tōmānāni nāwangä botō angainō ante ēñencædānimpa, ante Wængonguï pönō ængä beyænque quēwencædānimpa, ante nē waa cæinēnongä ingampa.

⁵ Edæ adocanque Wængonguī inongä ingacäimpa. Tö-mengä woadäni inänite adinque, Wadäni bai inänipa, ante nänënë quëwengacäimpa. Ininque Itota Codito në Waocä ëñagaingä inte tæcæguedë adocanque në pongä inte, Woadäni Wængonguī guiidënäni badinque adoyömö bee tente godongämæ quëwencädänimpa, ante pönö cægacäimpa. ⁶ Tömengä inömö mönö imonte ante godonte æncæte ante cædinque nämä wepæ incæ godoncæte ante në pongä ingacäimpa. Wængonguī, Iïönæ, ante nänö angaiïönæ incæ iinque bayonte mäninö Codito nänö cægainö ante, Nö impa, ante tömänäni inänite në odömongä ingacäimpa. ⁷ Mäninö ante bitö në apænebi bacæbi-impä, ante Wængonguī botö imote angä ëñëninque botö tömengä nänö në da godömo batäbopa, ante näwangä ämopa. Edæ babæ änämaï imopa. Ayæ näwangä mönö pönënö ante Wængonguī, Wadäni oodeoidi inämaï inäni adobai pönencädänimpa, ante cædinque botö imote angä ëñëninque botö tömengä nänö në odömonte apænedömo imopa.

⁸ Wayömö wayömö godongämæ mini pönencabo on-gonte munitö onguinæmini inömö në püinämaï imini inte Wængonguī ingante apænemini adinque botö waa to-baimopa. Wadäni inänite në püinte wæætedö wæætë änämaï inte wæætë tæiyæ waëmö entawëmini inte Wængonguī ingante pædæ æmpote apænecæminimpa, ante ainëmopa.

⁹ Ayæ onquiyæmini inömö waëmö weocoo mongæmini incæte munitö, Botö waëmö weocoo mongæmo adinque wadäni botö imote waa acädänimpa, ante änämaï inte nämä baö ante guinëñate pönëninque weocoo ædæmö wëñate mongæncæminimpa. Munitö ocaguī que que cæmini incæte oodo badöi tönö pededamö nani ämö wente cädämaï incæminimpa. Waëmon-

coo nāni nanguī godonte ænincoo nāni waa acoo ante mīnitō mongænāmaī incæmīnimpa. ¹⁰ Wæætē edæ Wængonguī ingante, Bitō Wængonguī Awēnē imidō anguēnē, ante nē watapæ apænemīni imīni ininque mīnitō mīni apæneī bai cædinque mīni waa cæquēnēnō ante pōnencæmīnimpa. Mānōmainō ante pōnente quēwencæmīnimpa, ante adobai aīnēmopa. ¹¹ Wadāni apæneyōnāni mīnitō onquiyæmīni tededāmaī inte ēa-monca ongonte ēñencæmīnimpa. Ayæ nē āmōni mōni ānō ante ēñēnīnque wadō pōnēnāmaī inte do ēñente cæcæmīnimpa, āmopa.

¹² Godongāmæ mīni pōnencabo weca ongonte mīnitō onquiyæmīni iñōmō odōmonte apænedāmaī incæmīnimpa, ante botō wææ āmopa. Ayæ adobai onguīñæmīni imīnite onquiyæmīni iñōmō, ĩmaī cæedāni, ante ānāmaī incæmīnimpa, ante wææ āmopa. Wæætē tededāmaī ēñencæmīnimpa. ¹³ Wængonguī edæ onguīñængā Adāo ingante tāno badōnīnque ayæ onquiyængā Eba ingante badongacāimpa. ¹⁴ Ayæ Tatāna wīi Adāo ingante wapiticæ māocā oda cægacāi. Wæætē Eba ingante æpiticæmē māocā oda cædinque do wēnæ wēnæ cæcā bagacāimpa. ¹⁵ Incæte onquiyænāni Wængonguī ingante godōmenque pōnēnīnque cōwē waadete pōnēnāni inōnāni inte nē nō pōnente tæiyæ waēmō entawēnāni ininque tōmēnāni wēñænāni inānite māñōnānite Wængonguī wææ aacā beyænque quēwencædānimpa, āmopa.

3

Godongāmæ mōnō pōnencabo iñōmonte nē aadāni

¹ ĩmaī ante nāni ānō nō pōnī ante impa. Godongāmæ mōnō pōnencabo iñōmonte, Aacæboimpa, ante nē angā iñōmō tōmengā waa cæquīnō ante pōnō cæinengā ingampa. ² Incæte wadāni, Wēnæ wēnæ cæcā ingampa, ante ānāmaī incædānimpa, ante cædinque nē aacā

wæætē waa quēwenguēnengā ingampa. Edæ tōmengā nānōogænā adodanque nē manguiwengā incæcäimpa. Tōmengā tōō pōnente nō quēwengā incæcäimpa. Nōinō cæcäimpa, ante pōnēninque nāmā wææ ante nē cæcä incæcäimpa. Waodāni botō imote waa acædānimpa, ante cædinque waa quēwencæcäimpa. Waodāni inānite, Botō oncōnē pō cæedāni, ante cōwē nē watapæ angā incæcäimpa. Ayæ tōmengā nē waa odōmonte apæneca incæcäimpa. ³ Nē aacā tī nāmæ bete beyæ quidi quidi dowænāmaī quēwenguēnengā ingampa. Wacā ingā do piinte cædāmaī inongā inte wæætē ædæmō cæcä inte quēwencæcäimpa. Tōmengā piyænē cæcä incæcäimpa. Tōmengā godonte nāni æinta ante waadete pōnente wædāmaī incæcäimpa ämopa.

⁴ Nē aacā tōnō godongāmæ quēwēnāni inānite tōmengā waa aaquēnengā ingampa. Tōmengā wēñænāni inānite ædæmō aacā beyæ tōmēnāni wæætē tōmengā ingante waa adinque tōmengā nānō änō ante ēñente cæte quēwencædānimpa. ⁵ Edæ nē aacā tōnō godongāmæ quēwēnāni inānite tōmengā wīi waa aacā ininque Codito ingante godongāmæ mōnō pōnencabo iñōmonte ædō cæte waa aacā inguingāā.

⁶ Itota Codito ingante ñōwo tæcæ pōnēningā wīi nē aacā baquēnengā ingampa. Edæ mænōmaī inongā iñongante mīnitō, Nē aabi imipa, ämīni ininque tōmengā nāmā incæ, Adoboque waa cæbo imopa, ante pōnengā imaingampa. Wēnæ awēnē mænōmaī pōnengā beyænque Wængonguī tōmengā ingante apænte nānō panguinō bai nē aacā ingante adobaī apænte pämaingampa. ⁷ Ayæ adobaī Itota Codito ingante nē pōnēnāmaī ināni nē aacā ingante adinque, Tōmengā nē waa cæcä ingampa, ante acædānimpa, ante cædinque tōmengā waa quēwenguēnengā ingampa. Tōmengā waa cædāmaī ingā adinque tōmēnāni wæætē, Tōmengā wēnæ wēnæ cæcä ingampa,

ante piimainänipa. Tömengä waa cædämaï ingä piinäni ininque wænæ awënë iñömö, Tömengä oda cæcæäimpa, ante godö cæcä ate tömengä do wænæ wænæ cæcä babaingampa.

Mönö pönencabo tönö godongämæ në cædäni

⁸ Mönö pönencabo tönö godongämæ në cædäni iñömö adobai, Mönö eyepæ cæte quëwëmö ininque wadäni mönö imonte waa acædänimpa, ante cædinque waa quëwenguënänäni inänipa. Në cædäni nämä näni änö bai ante nö cæcædänimpa. Tömänäni yowepæ wædænque ti nämæ biinömæ näni ämä wii nangui becædänimpa. Babæ cæmöni incæte godonte näni äinta cöwë godömenque æncæmönimpa, ante wadäni näni pönëwënonque ante iinäni wæætë mäninö ante pönënamäi incædänimpa. ⁹ Edæ nämä apænte pönëninque wentamö mongænämaï entawënäni inte tömënäni Wængongui nänö wë wodonte angainö ante tæcæ ëñëninque tömënäni, Nö pönï mönö pönënö impa, ante cöwë wede pönenguënänäni inänipa. ¹⁰ Ayæ mäninäni inänite minitö, Quinö cæmïni imïni, ante ëñencæte ante cöwä acæmïnimpa. Ayömïni tömënäni cöwë waa cæte quëwënäni adinque minitö wæætë tömënäni inänite, Minitö mönö pönencabo tönö godongämæ në cæmïni bacæmïnimpa, ante ämïni bacædänimpa.

¹¹ Tömënäni nänöögæidi inänite wadäni waa acædänimpa, ante cædinque adobai eyepæ cæte waa quëwenguënänäni inänipa. Mäninäni iñömö wadäni inänitedö ante babæ änämaï incædänimpa. Wæætë adodäni cöwë töö pönente nö quëwënäni incædänimpa. Tömënäni cöwë pönëninque, ïimaï cæcæmönimpa, ante näni äniinö bai ædæmö cæcædänimpa. ¹² Mönö pönencabo tönö godongämæ në cæcä iñömö tömengä nänöögænä adodanque në manguiwengä incæcäimpa.

1 Tímoteo 3:13 10 1 Tímoteo 3:16

Tömengä wēñænāni inānite ayæ tömengä tönö godongämæ quēwēnāni inānite tömengä nē waa aaquēnengä ingampa. ¹³ Mönö pönencabo tönö godongämæ nē cædāni iññömö, Nē waa cædināni inānipa, ante adinque mönö tömēnāni inānite waa ämompā. Ayæ mänömaï waa cædināni inte mänināni, Itota Codito ingante pönēedāni, ante guiñēnāmaï apænecædānimpa.

Wē wodonte nāni angainö edonque pōni batimpa, ante

¹⁴ Quingæ bitö weca acæ poncæboimpa, ante pönēmo incæte botö, ñimaï cæe, ante bitö ñimite yewæmömopa.

¹⁵ Botö wæætē wii quingæ pōmo ñinque bitö, Mönö Wængongui tönö godongämæ quēwencabo inömö inte mönö æbänö cæquiï, ante bitö ēñencæbiimpa, ante yewæmömopa. Edæ Wængongui nē Quēwengaingä quimö inömö inte mönö Codito ingante godongämæ mönö pönencabo iññömö mönö cobacadewæ tæï ongö bai tömengä nö nänö angainö ante ñimpo cædāmaï inte wæætē wææ cæmö ñmompā. ¹⁶ ñimaï ante nö pōni impa. Wængongui ayongä mönö æbänö waa cæte quēwenguï, ante Wængongui wē wodonte nö nänö angainö incæ ññowoyedē edonque pōni mönö ēñēnö iññömö waa pōni impa. ñimaï impa.

Wængongui inguipoga iññömö ponte ēñadinque Waocä bacä agadānimpa.

Tömengä ingantedö ante Wængongui Öñowoca, Māningä waëmö quēwēnongä ingampa, angacäimpa.

Tömengä ingante Wængongui anquedoidi do agadānimpa.

Wabæca wabæca nāni quēwencabo inānite Itota nänö cægainö ante apænecatimpa.

Tömämæ quēwēnāni pancadāniya tömengä ingante pönente bagadānimpa.

Ayæ tömengä ñäö bai ēmöninque öönæde iññömö ocæ émænte gogacäimpa.

Mänömainö ante nāni ämotamini änö bai impa.

4

Në pönänani pancadäniya wadæ goquinäni inänipa, ante

¹ Wængongui Önöwoca iimaï ante edonque pöni apænecampa. Iñque iïönæidi bayonte Codito ingante në pönänani incæ pancadäniya ñimpo cæte tömengä ingante pönänamaï bacædänimpa. Iñinque önöwocaidi incæ në, Wapiticæ oda cæcædänimpa, ante në wænæ wænæ cædönäni miñæ tee empo gocædänimpa. Goyönäni wænæidi nāni odömönte apænewënö ëñente cæquinäni inänipa. ² Në babæ änäni në wadö tedete wadö cædäni iïömö tömënäni mäninö wænæidi nāni odömönte apænewënö ante në odömönte apænedäni inänipa. Iñäni guiquënë tömënäni nämä nāni apænte pönönö ante ömætawënäni inte wænæ wænæ nāni cædinö ante wädämaï quëwënanipa. ³ Mäninäni iïömö waodäni inänite wææ äninque, Minitö, Botö nänöogængä, ante onquiyængä ingante mönāmaï iedäni, änänipa. Ayæ adobaï mönö waa cængui adinque pancaa ante, Cænāmaï iedäni, ante wææ änänipa. Iñæmpa Wængongui edæ tömäa cængui badongacäimpa. Tömengä, Botö imöte waa ate pönente apænedinque në pönänäni iïömö botö nö angainö ante ëñönönäni inte cængui ænte cæncædänimpa, angampa.

⁴ Edæ Wængongui nänö badongaincoo tömancoo waa pöni i iñönte mönö Wængongui ingante waa ate pönente apænedinque tömäa cængui æmö iñinque pancaa ante ædö cæte Baa ante ænāmaï inguii. ⁵ Iñæmpa Wængongui nänö angainö beyænque ayæ tömengä ingante waa ate pönente apænemö beyænque tömäa cængui iïömö täiyæ waëmö cængui bapa.

Itota Codito ingante në waa cæcä

⁶ Bitō godongāmæ mīni pōnencabo iñōminite bitō māninō botō ānō ēñēninque bitō tōniñadāni inānite wæætē odōmōmi iñinque Itota Codito beyæ nē waa cæquīmi incæbiimpa. Ayæ Wængonguī nānō angainō ante mōnō pōnēnō ante ēñente quēwēninque bitō waa mōnō odōmonte apænedō ante nē ēñente cædīmi inte edæ tōmo cænte bai nē nō cæbi incæbiimpa.

⁷ Babæidi bai nē tedewēnāni inānite ēñēnāmaī inte bitō onquiyænāni picænāni incæ ōnonquedō ante nāni tedewēninō ante ēñēnāmaī incæbiimpa. Wæætē, Wængonguī ayongā mōnō waa cæte quēwencæte ante cædinque bitō iñōmō tæi ewocabo badinque cæcæboimpa, ante godōmenque godōmenque cæcæbiimpa. ⁸ Mōnō baō tææmō bacæimpa, ante cædinque mōnō ñimpo cædāmaī inte adodō adodō cæmompā. Māniñonque ante mōnō cædō guiquēnē wædænque waa impa. Wæætē Wængonguī ayongā mōnō waa cæte quēwēmō iñinque mōnō ñōwoyedē waa quēwēninque adobai iincayæ ate waa quēwenguimō incæmōimpa. Iñinque māninō ante mōnō cæquinō iñōmō tōmāā beyæ nō waa pōni i iñinque, Mōnō tæi ewocaquimō, ante cædinque mōnō ñimpo cædāmaī inte adodō adodō cæcæimpa.

⁹ Mānōmaīnō ante nō pōni nāni ānō nāwangā ante impa, ante āmo ēñēmaīmīnīpa. ¹⁰ Mānōmaī beyæ tæi piñænīnque nanguī cæmō imompā. Edæ, Wængonguī nē Quēwengāingā beyænque mōnō watapæ quēwengæimpa, ante pōnengāimō imompā. Tōmengā iñōmō mōnō wocabo tōmāmō imonte, Quēwenguimīni, ante nē Ængāingā incæ tōmengā ingante nē pōnēmō iñōmonte nō ængā beyænque mōnō quēwengæimpa.

¹¹ Māninō botō ānō ante bitō tōmēnāni inānite, iīmaī cædāni, ante odōmonte apænecæbiimpa, āmopa.

¹² Bitō wiī picæmi incæte æcāmenque iñongante bitō,

Botö imote püinte adämaï incæcäimpa, ante pönente quëwencæbiimpa. Wæætë edæ bitö Wængongui ingante në pönëni beyæ ante, Botö cæbaï tömëni adobaï cæcädänimpa, ante iïmaï cæcæbiimpa. Apænebi incæ waa cæte quëwëmi incæ waadete pönëmi incæ wede pönëmi imi incæ nö pönente waa cæbi incæ bitö, Botö baï bacädänimpa, ante cædinque bitö cædö ante odömömi adinque tömëni adobaï cæcädänimpa. ¹³ Botö pönämaï inguinganca bitö ongöñömö iñömö Wængongui angä ëñente nani yewæmongainö adinque adodö ante ædæmö apænebi ëñencädänimpa. Ayæ Wængongui ingantedö ante apænebi inte odömonte apænebi ëñencädänimpa. Mäninonque cæte ongoncæbiimpa. ¹⁴ Mini pönencabo iñöminite në aadani nani Picæncabo iñömö bitonga gampo cædinque Wængongui beyæ apænedinque bitö imite, Bitö në aabi badinque në odömonte apænebi bacæbiimpa, ante pönö apænedänitapa. Ìninque bitö do në aabi badinque në odömonte apænebi bagaimi inte godömenque godömenque cæcæbiimpa.

¹⁵ Edæ waodani tömänani bitö æbänö godömenque waa cæbi imi adinque ëñencädänimpa, ante cædinque bitö mäninonque ante pönëninque godömenque godömenque cæcæbiimpa. ¹⁶ Bitö quëwënö ante, Æbänö quëwëmoo, ante nämä wææ aacæbiimpa. Ayæ bitö odömonte apænedö ante, Botö nö pönëninque odömonte apæneboimpa, ante wææ cæcæbiimpa. Edæ mänömaï cæte wæntädämaï inte cöwë cæcæbiimpa. Bitö mänömaï cæbi ìninque tömëmi nämä incæ wantæpiyæ quëwencæbiimpa. Bitö odömonte apæneyömi në ëñëni iñömö adobaï bitö cædö beyænque wantæpiyæ quëwencädänimpa.

5

Nē pönēnāni inānite æbänö cæcæbiimpa, ante

¹ Onguĩñængä picængä wēnæ wēnæ cæcä incæte tö-mengä ingante piinte änāmaĩ incæbiimpa. Wæætē tömēmi mæmpocä ingante ante bai tömengä ingante waadete ämi ēñencæcäimpa. Edēnināni iñömö tömēmi biwiidi inānite ante bai tömēnāni inānite waadete ämi ēñencædänimpa. ² Onquiyænāni picænāni iñömö tömēmi wäänä inante ante bai bitö tömēnāni inānite adobaĩ waadete ämi ēñencædänimpa. Ayæ baquedāni iñömö tömēmi biwinqueidi inānite ante bai tömēnāni inānite waēmö mīmönē waadete ancæbiimpa.

³ Owæmpoināni nē nāwangä ömæpodāni inte quēwēnānīpa, ante tömēnāni inānite waa adinque pönö cæcæbiimpa. ⁴ Incæte owæmpoingä wēñænāni næængä ininque nänömoidi næængä ininque mänināni wæætē tömengä beyæ cæquēnēnānīpa. Edæ mänināni tāno tömēnāni tönö godongämæ quēwēnāni inānite waa adinque nāēmæ nāni cæquēnēnö ante, Æbänö cæquii, ante ēñente cæcædänimpa. Mänömaĩ cædinque tömēnāni mæmpoidi tönö mæmæidi tömēnāni inānite waadete nāni cædi bai iñnāni adobaĩ mæmpoidi tönö mæmæidi inānite nāēmæ waadete cæcædänimpa. Edæ mänömaĩ cædāni adinque Wængonguĩ waa acæcäimpa. ⁵ Nē nō ömæpocä inongä inte adodanque quēwengä ininque tömengä nē owæmpoingä inongä inte Wængonguĩ beyænque watapæ quēwengæimpa, ante pönengä ingampa. Itædē incæ woyowotæ incæ tömengä ñimpo cædāmaĩ inte, Botö beyæ cæquimi, ante Wængonguĩ ingante apænete quēwengampa. ⁶ Wæætē owæmpoingä tote quēwengæimpa, ante nāmanque pönente nē quēwēnongä guiquēnē tömengä miĩ quēwengä incæte do wænte bai ingampa töö.

⁷ Tömēnāni inānitedō ante wēnæ wēnæ ānāmaī incædānimpa, ante wææ cædinque bitō mānīnō botō ānō ante adodō ante āmi ēñencædānimpa. ⁸ Æcānō guidēnāni inānite pōnō cædāmaī inaa ayæ tōmengā nāni wencabo inānite pōnō cædāmaī inaa tōmengā iñōmō Wængonguī nānō angaiñō mōnō pōnēnō ante do Baa ānīnque wīī ēñente cæcampa. Ayæ nē pōnēnāmaī ingā wēnæ wēnæ cæcā iñongante māningā iñōmō godōmenque wēnæ wēnæ cæcā ingampa tōō.

⁹ Owæmpoīnā do tetenta wadepo ganca godōmenque nē picænā inōnā inte tōmēnā nānōogængā wodi ingante nē mōnīnanque quēwēnā ingadāimpa, ante adīnque bitō, Wængonguī quī, ante mōnō godonte ānīnta mānīnā owæmpoīnā nē ænguīnā incædāimpa, ante tōmēnā ēmōwo ante yewæmoncæbiimpa. ¹⁰ Edæ tōmēnā wēñānāni inānite waa cædā pædāni inānitawo. Wadāni inānite tōmēnā, Botō oncōnē pō beedāni, ante waa apænedā inantawo. Wængonguī quīnāni iñōnānite tōmēnā nāmā pōnēnāmaī inte waa cædantawo. Nē wæwēnāni inānite adīnque tōmēnā tōmēnāni tōnō godongāmæ cædantawo. Ayæ, Quiēmē waa cæcæimpa, ante mānīnonque ante pōnēnīnque cæte quēwēnantawo. Mānōmaī quēwēnā adīnque waodāni, Mānīnā nōīnā waa cædā inōnampa, ante do ēñēnāni inānitawo, ante adīnque bitō wæætē tōmēnā ēmōwo ante yewæmoncæbiimpa. Ayæ wadāni mānīnā bai iñōnānite bitō, Wængonguī quī, ante mōnō godonte ānīnta mānimpodānīque nē ænguīnāni incædānimpa, ante tōmēnāni ēmōwo ante yewæmoncæbiimpa.

¹¹ Wæætē edæ owæmpoīnāni wīī picænāni iñōnānite bitō tōmēnāni ēmōwo ante yewæmōnāmaī inte Baa ancæbiimpa. Ayæ toīnente wæwēnīnque Codito ingante ñimpo cæte wadæ godīnque wæætē, Wacā nānōogængā

ingante möinēmopa, ante quēwēnānīpa. ¹² Edæ tōmēnāni Codito ingante, Botō bitō beyēnque cæcæboīmpa, ante tāno nāni angainō ante ñimpo cædāni beyæ Wængonguī apænte pangā wæcædānīmpa. ¹³ Ayæ godōmenque iīmaī cædānīpa. Tōmēnāni cædāmaī inte wæntæye badinque adobaī wacōnē wacōnē acæte ante önonque godāni inānīpa tōö. Ayæ wīi önonque wæntæyedānique badinque tōmēnāni, Wadāni æbānō cædānīi, ante gote adinque wadāni nāni cædōnō ante godō wæntæ godō wæntæ tededāni inānīpa. Edæ wīi nāni anguēnēnō ante do ānewēnānīpa. ¹⁴ Mānōmaī beyæ botō owæmpoīnāni wīi picænāni inānite iīmaī āmopa. Mīnitō wæætē mön-inque wēñænāni māedāni. Ayæ oncōnē mīni cæquēnēnō ante cædāni. Wadāni edæ mönō imontedō ante wēnæ wēnæ nāni tedewēnō ante tededāmaī incædānīmpa, ante mīnitō mānōmaī cæte waa quēwēdāni, āmopa. ¹⁵ Iñæmpa owæmpoīnāni pancadāniya do Itota Codito ingante emō cæte godinque Tatāna miñæ tee empocæ godānitapa tōö.

¹⁶ Onquiyængä nē pönengä iñömō tōmengä guidēnāni owæmpoīnāni næængä iñinque tōmengä tōmēnāni beyæ cæcæcāīmpa. Codito ingante godongāmæ mīni pönencabo iñōmīnite tōmengä, Botō guidēnāni inānite godōmīni æncædānīmpa, ante ānāmaī incæcāīmpa. Mānōmaī cædinque Codito ingante mīni godongāmæ pönencabo wæætē, Owæmpoīnāni nāwangä ömæpodāni inānīpa, ante adinque tōmēnāni inānite godōmīni æncædānīmpa, āmopa.

¹⁷ Wængonguī ingante godongāmæ mīni pönencabo iñōmīnite nē aadāni nāni Picæncabo iñömō nō waa aadāni iñönānite mīnitō tōmēnāni inānite waa aquēnēmīni imīnīpa. Mānīnāni Wængonguī nānō angainō ante nē apænedāni inte ayæ nē odōmonte apænedāni iñönānite mīnitō godōmenque nanguī waa acæmīnīmpa. ¹⁸ Edæ

Wængonguī iīmaīnō ante apænecā ēñēnīnque yewæmongadānīmpa. “Wagada onguīñængā nē cæcā inte tōmentapo æ yacæīmpa, ante āmi pīnā pīnā gāwate cægōñongā bitō tōmengā ōnōne wææ wodōnedāmaī inte ee abi cæncæcāīmpa,” ante yewæmongatīmpa. Ayæ godōmenque iīmaī ante īmpa. “Nē cæcā iñōmō tōmengā nānō cædinō beyæ ante nē ænguēnengā ingampa.” Mānōmaī yewæmongadānīmpa.

¹⁹ Godongāmæ mīni pōnencabo iñōmīni waocā adocanque iñōmō bitō īmite apænedīnque, Māningā nē aacā Picængā iñōmō wēnæ wēnæ cæcantapa tōō, ante āñongante bitō ēñēnāmaī incæbiīmpa. Wæætē waoda mēnaa nē babæ wapiticæ ānāmaī īna inte bitō īmite apænedīnque, Tōmengā nē wēnæ wēnæ cæcantapa, ante adodō apænedā ēñēnīnque bitō nē āna īnate ēñencæbiīmpa. Ayæ waodāni mengāa go adocanque adobaī adodō apænedāni ēñēnīnque bitō nē ānāni īnānīte ēñencæbiīmpa.

²⁰ Nē wēnæ wēnæ cædōnāni incæ nīmpo cædāmaī īnānīpa, ante adīnque bitō wæætē godongāmæ ongōnāni ēñēñōnāni mānīnāni īnānīte nanguī ancæbiīmpa. Godongāmæ ongōnāni ēñēñōnāni bitō mānōmaī āmi īnīnque tōmēnāni wæætē guīñēnīnque, Wēnæ wēnæ mōnō cæquīnō ante cædāmaī incæmōīmpa, ante pōnencædānīmpa.

²¹ Mōnō Wængonguī ayongā Itota Codito ayongā Wængonguī nānō apænte ænīnāni anquedoidi ayōnāni botō iīmaī āmopa. Mānīnō botō ānīnō ante ēñēnte cædīnque bitō, Adoyōmō pōnī īnānīpa, ante tōmānāni īnānīte adoyōmō godō cæbi incæbiīmpa. Wīī adocanque ingante, Botō nē waa adīmi īmīpa, ante tōmengā ingante wadō cædāmaī incæbiīmpa. ²² Æcāmenque ingante, Mōnō pōnencabo beyæ bitō nē cæbi baquīmi, ante pōnēmi inte

bitö tömengäa quingäe gampo cädämaï ie. Edäe quingäe gampo cæbi nē cæcä badinque edäe tömengä wënä wënä cæcä ïininque bitö adobaï tömengä tönö wënä wënä cæbi baquënëmi ïmipa. Bitö tömëmique godömenque wënä wënä nāni cæpāmo ante tömānö ante Baa ante waa cæte quëwëe.

²³ Bitö cæinca cædente wæbitawo. Ayæ wantæ wantæ ïñö wantæ wantæ ïñö wënä wënä inte wæbitawo. ïininque wïi æpænque bee ämopa. Wæætë biïnömæ wædænque betë quëwencæbiimpa.

²⁴ Wængonguï nānö apænte anguiönæ badämaï ïñedë incæ waodäni pancadäniya wënä wënä nāni cægäinö do edonque pönï impa. Wadäni guiquënë wënä wënä nāni cægäinö wë wodonte i incæ mäniñedë edonque pönï baquïnö anguënë. ²⁵ Ayæ adobaï waodäni waa nāni cægäinö do edonque pönï impa. Ayæ ñöwoyedë pancaa waa nāni cægäinö wïi edonque pönï i incæte wïi cöwë wë wodonte ingæimpa. Wæætë edonque pönï aquinö anguënë.

6

¹ Waodäni awënëidi nāni nē ö ænināni inte awënëidi beyænque cæte ñä cæyænte baï nē quëwënāni ïñömö tömënāni tömānāni awënëidi ïnānite waa ëñente cæcædänimpa. ïñæmpa tömënāni nē pönënāni inte wïi waa ëñente cædāni baï wadāni wæætë Wængonguï ëmowo ante wënä wënä ante babæ anguënënänimpa. Adobaï mönö odömonte apænedinö ante, Wënä wënä impa, ante anguënënänimpa. ² Tömënāni awënëidi ïñömö nē pönënāni ïnāni beyænque nē cædāni ïñömö, Botö tönïñacunque ïnongä inte botö awënë ïñömö önonganque ingä awædö, ante piināmaï incædänimpa. Wæætë edäe nē cædāni ïñömö, Botö cæbo nē ængä ïñömö nē pönengä ïnongä inte Wængonguï nānö nē

waadecä ingampa, ante adinque tömënäni awënëidi inänite godömenque waa ëñente cæcædänimpa.

Näwä mäincoo ante

Īninqe Tímoteo ëñëmi. Mäninö ante tömënäni inänite odömonte apænedinque bitö adodö adodö ante ancaa ancæbiimpa, ämopa. ³ Pancadäniya wadö ante odömonte apænedinque mönö Awënë Itota Codito nö pöninänö angainö ante Baa änänipa. Ayæ mönö odömonte apænedö ante tömënäni Wængongui ayongä mönö waa cæte quëwenguënnö ante Baa änänipa. Īninqe æcänö mänömaï Baa äna iñömö ⁴ tömengä nämä incæ, Botö gomonga waa ëñëmopa, ante në pönëongä ingä incæte tömää ëñënamingä ingampa. Tömengä nämämanque nänö pönëwënö ante wæætedö wææte tededinque, Ædedö ĩ, ante wacä tönö guëadö guëa äinëwente wæcampa. Tömengä mänömaï tedecä beyænque wadäni në gomonga ëñengä ingante godö piinte adänipa. Godongämæ wadodö wadö piinte tedewënänipa. Wacä ingä wacä ingä, Bitö wënæ wënæ cæbi imipa, ante änewënänipa. Nämä nani wënæ wënæ pönënonque ante, Wadäni wënæ wënæ cædänipa, ante pönëwënänipa. ⁵ Ayæ ocaidë pönente wentamö encadäni inte tömënäni Wængongui näwangä nänö angainö incæ ëñënamäi badänipa. Īninqe nani cabo incæ wacä ingä wacä ingä guëadö guëa apænete nani piincabo inänipa. Ayæ mäninäni adobai, Wængongui ayongä waa cæte quëwëmö beyænque nanguï äate baquimö, ante pönëwënänipa.

⁶ Īñæmpa mäincoo quincoomë ëacä incæte, Mäninque ëabopa, ante piyænë cæte quëwëongä iñömö tömengä Wængongui ayongä waa cæte quëwengä beyænque wat-apæ quëwëongä inte nö nanguï ëacä ingampa. ⁷ Edæ mönö ĩi inguipoga iñömö ömaamö pontamopa. Adobai

ömaamö inte tao goquimö imompa. ⁸ Incæte mönö cænguï tönö weocoo ëamö inte mäninque beyæ mönö watapæ quëwenguinque imompa. ⁹ Wadäni guiquënë, Mäincoo nanguï ëainëmönipa, ante quëwënäni inte tömënäni wënæ wënæ nāni cæinëmāmo badinque oda cæte goquïnānidö anguënë. Mänömaï cædinque tömënäni, Quinö önonque impa, ante æinente badānipa. Ayæ wënæ wënæ nāni baquinque edæ æinëwënäni inte quiëmë incæ tömënäni æmæwo ömæe nāni ëwenguinonque gocædānimpā. ¹⁰ Waodāni nāni godonte æinta waadete pönente nāni wædö beyæ wadö wadö nāni wënæ wënæ cæpāmo pompa. Edæ pancadāniya, Mönö godonte ænguinta ængæïmpa, ante pönëninque tömënäni nāni wede pönenguënëno ñimpo cæte wadæ godinque nāmā nāni cædö beyænque nanguï wæwente badānitapa.

Mönö wede pönëno ante mönö tæi ëwocate cæcæïmpa

¹¹ Bitö guiquënë Wængonguinque ingante në cædömi inte mäninö tömänö ante ñimpo cæte wodii gote bai quëwencæbiïmpa, ämopa. Wæætë mönö nö cæquënëno ante cæte quëwencæbiïmpa. Wængonguï ayongä mönö waa cæte quëwengæïmpa, ante cæcæbiïmpa. Mönö wede pönëmāmo, ante godömenque pönente quëwencæbiïmpa. Waodāni inānite godömenque waadete pönencæte ante cæcæbiïmpa. Ayæ tæi piñante entawëninque wæntæye badāmaï inte ee cæcæbiïmpa. Cöwë ædæmö cæte quëwencæbiïmpa. ¹² Wængonguï ingante mönö wede pönëno ante mönö cæquënëno ante bitö tæi ëwocate cæcæbiïmpa. Mönö wænāmaï quëwenguinö goquimö, ante pönente ñimpo cædāmaï incæbiïmpa. Edæ waodāni tæiyänäni ëñëñönäni, bitö, Wængonguï ingante wede pönente babopa, ante añömi Wængonguï edæ, Mäninö quëwenguinö gocæbiïmpa, ante bitö imite apænte aa

pecantapa. ¹³ Wængongui pönö cæcä beyænque quingämenque incæ tömänäni quëwënäni inänipa. Itota Codito iñömö Pontio Pidato ingante apænedinque, Quinö nö impa, ante edonque pöní apænegaingä ingampa. Edæ Wængongui tönö Itota Codito mänömainö ingäina iñöna botö tömëna ayöna bitö imite, iïmai cæe, ämopa. ¹⁴ Mönö Awënë Itota Codito nänö ocæ emænte ponguinganca bitö mäninö botö wææ änö tömänö ante waa ëñente cæcæbiimpa, ämopa. Bitö ëñente cædö adinque wadäni ædö cæte, Wënæ wënæ impa, ante anguinäni, ante pönente cöwë waa pöní cæcæbiimpa. Mänömai ante ämopa.

¹⁵ Wængongui nänö ainenguïönæ bayonte Itota ocæ emænte poncæcäimpa. Mönö Awënë Wængongui iñömö tömengä adocanque Wængonguinque ingaingä inte nê waa pöní inongä ingampa. Tömënaní awënë odeyeidi iñönänite tömengä Tæiyæ Awënë Odeye inongä ingampa. Ayæ tömengä iñömö awënëidi tömänäni Awënë inongä ingampa. ¹⁶ Tömengä adocanque nê wantæpiyæ wænämai inongä inte nê Quëwengä ingaingä ingampa. Tömengä tömää ñäö iñömö quëwënongå inongante waodäni ædö cæte tömengä weca goquinäni. Tömengä mönö waocabo mönö nê adämai ingaingä ingampa. Edæ tömengä ingante mönö ædö cæte aquií. Tömenganque ingante waodäni tömänäni waa aquinänidö angüënë. Tömenganque cöwë nê tæi piñænongä inte quingämenque quëwënäni iñönänite tömengä tömänäni Awënë ingüingänö angüënë. Mänömai babaimpa, ante, Amëe, ämopa.

¹⁷ Inguipogaque mäincoo nê nanguí ëadäni inänite bitö iïmai ancæbiimpa. Nanguí ëamöni inte mönitö godömenque waa pöní imönipa, ante pönënamäi iedäni. Iñæmpa mäincoo mönö ëadincoo iñömö quingæ dæ ä apa quëwënäni. Iñinque mïni mäincooque ante wii mänincooque ante pönëedäni. Wæætë, Wængonguinque

beyænque watapæ quëwengäimpa, ante pönëedäni, ancæbiimpa, ämopa. Edæ, Mönö qui quïnö dæ ä, ante wæmö adinque tömengä mönö imonte, Mïni watapæ quëwen-guinque, ante tömää nê pönongä ænguimö imompa. ¹⁸ Mäninäni nê nanguï ëadäni inänite bitö, Mïnitö quïnö waa cæquiï, ante mäninonque cæcæmïnimpa, ancæbi-impä. Waa mïni cæquïnö ante mïnitö nanguï cæte quëwencæmïnimpa. Ayæ do Ao ante mïnitö mäincoo mïni ëadincoo pancacooga pædæ godömïni æncædänie, ancæbiimpa, ämopa. ¹⁹ Mäninö bai nê cædönänique, Mönö nämä beyæ ëaquincoo, ante öönædë iñömö do cö cæte bai cædänipa. Mänömaï cædinque tömënäni, Nö pönï mönö quëwenguinque impa, ante iincayæ ate æncædänimpa.

Timoteo ingante, Pabodo iinque wææ angampa

²⁰ Timoteo ëñëmi. Wængonguï, Wææ aacæbiimpa, ante bitö imite quïnö pönongä bitö ö æninö ante wææ ae. Tæiyæ waëmö ëwocadämaï inte wadäni önonquedö ante näni änönö ante ëñënämaï ie. Adobaï wadäni, Mönitö ëñente ate nanguï encaimöni imönipa, ante nê babæ änäni iñönänite bitö wadodö wadö näni anewënö ante ëñënämaï ie. ²¹ Tömënäni näni anewënö ante pönëninque waodäni pancadäniya Wængonguï ingante näni pönëninö ante do ñimpo cædinque wadæ godinäni inänipa.

Wængonguï bitö imite waadete pönö cæcæcäimpa, ante botö mäninque ante yewæmömopa.

Wængongui nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
